
Ordinaziun davart la scola media d'informatica (OSMI)

Dals 29-04-2024

Relaschs tangads da questa fatschenta (numers dal DG)

Nov: **425.150**
Midà: 425.060 | 425.080 | 425.100 | 430.400
Aboli: –

Sa basond sin l'art. 45 al. 1 da la Constituziun chantunala¹⁾

relaschada da la Regenza ils 29 d'avrigl 2024

I.

Il relasch "Ordinaziun davart la scola media d'informatica (OSMI)" DG [425.150](#) vegn publictà sco nov relasch.

1. Disposiziuns generalas

Art. 1 Object

¹⁾ Questa ordinaziun regla la promoziun da semester e las cundiziuns per acquistar l'attestat federal da qualificaziun d'informaticra u d'informaticher sco er la maturitad professiunala per las scolas medias d'informatica cun maturitad professiunala, che vegnan manadas tenor las disposiziuns dal dretg federal.

²⁾ Reglaments da scolas medias privatas, che divergeschan da disposiziuns da questa ordinaziun, ston vegnir approvads da la Regenza.

³⁾ Uschenavant che questa ordinaziun na cuntegna naginas regulaziuns explicitas, vegnan applitgadas tenor il senn las disposiziuns da l'Ordinaziun davart il gimnasi²⁾ sco er las disposiziuns federalas davart la furmaziun fundamentala professiunala.

¹⁾ DG [110.100](#)

²⁾ DG [425.050](#)

Art. 2 Durada da la scolaziun

¹ Fin a l'acquist da l'attestat federal da qualificaziun d'informaticra u d'informaticher cun maturitad professiunala dura la scolaziun 4 onns. Per regla è ella dividida en ina furmaziun scolastica a temp cumplain da 3 onns ed en in praticum da manaschi lung dad 1 onn che sto vegnir absolvi sunter la furmaziun scolastica.

Art. 3 Plans d'instrucziun

¹ Instrui vegni tenor ils plans d'instrucziun ch'èn concepids tenor las directivas dal dretg federal ed approvads da la Regenza.

2. Promoziun

Art. 4 Roms da promoziun

¹ Ils roms da promoziun èn:

- a) ils roms dal sector da basa: emprima lingua naziunala (Deutsch, rumantsch / Deutsch, italiano); segunda lingua naziunala (tedesco, franzos, talian); terza lingua (anglais); matematica;
- b) ils roms dal sector d'accent tenor l'aggiunta 1;
- c) ils roms dal sector complementar tenor l'aggiunta 1;
- d) cumpetenzas d'informatica: la media da las notas, arrundada sin in'entira u ina mesa nota, per ils moduls dal sector d'instrucziun «cumpetenzas d'informatica» cun ina valitaziun dad 80 pertschient e las notas dals curs intermanaschials cun ina valitaziun da 20 pertschient;
- e) sport.

Art. 5 Promoziun da semester

¹ La promoziun en il proxim semester ha lieu, sche las suandantas premissas èn ademplitas il medem mument:

- a) en ils roms da maturitad professiunala instruids dal sector da basa, dal sector d'accent e dal sector complementar tenor l'artitgel 4 alinea 1 litera a fin litera c:
 1. la media da tut las notas da promoziun importa almain 4,0;
 2. la differenza da las notas da promoziun insuffizientas tar la nota 4,0 na surpassa tut en tut betg la valur da 2,0; e
 3. betg dapli che duas notas da promoziun èn sut 4,0.
- b) en tut ils roms da promoziun instruids tenor l'artitgel 4 alinea 1 litera a fin litera e:
 1. la media da tut las notas da promoziun importa almain 4,0;
 2. la differenza da las notas da promoziun insuffizientas tar la nota 4,0 na surpassa tut en tut betg la valur da 2,0; e
 3. betg dapli che trais notas da promoziun èn sut 4,0.

² Tgi che n'ademplescha betg questas premissas, vegn promovì provisoricamain. Suenter ina promoziun provisoria ston las cundiziuns da promoziun vegnir adimplidas en il proxim attestat. Uschiglio ston vegnir repetids ils ultims dus semesters.

³ Fin a la terminaziun da la scolaziun èsi pussaivel da repeter maximalmain ina giada in onn d'instrucziun.

3. Examens da maturitad professiunala

Art. 6 Termin dals examens finals da la maturitad professiunala

¹ Ils examens finals da la maturitad professiunala en scrit ed a bucca han lieu avant las vacanzas da stad a la fin dal terz onn da scolaziun.

² Il termin dals examens finals vegn fixà da l'Uffizi per la furmaziun media-superiura, resguardond las prescripziuns da la Confederaziun.

Art. 7 Admissiun

¹ Sch'i n'è betg avant maun ina permissiun excepziunala da l'Uffizi per la furmaziun media-superiura che concerna la frequentaziun da la scola, pretenda l'admissiun la frequentaziun d'ina scola media d'informatica en il chantun Grischun durant almain ils 2 ultims onns ed almain ina promoziun provisoria en l'ultim semester avant ils examens finals da la maturitad professiunala.

Art. 8 Participaziun da las scolas autas spezialisadas

¹ Las scolas autas spezialisadas ston sa participar adequatamain a la realisaziun dals examens finals da la maturitad professiunala.

Art. 9 Roms d'examen

¹ Examinads en scrit vegnan l'emprima lingua naziunala, la segunda lingua naziunala, la terza lingua (englais), matematica ed ils roms dal sector d'accent tenor l'aggiunta 1. La durada dals examens sa drizza tenor las disposiziuns dal dretg federal.

² Examinadas a bucca vegnan l'emprima lingua naziunala, la segunda lingua naziunala sco er la terza lingua (englais). Ils examens a bucca duran 15 minutas.

Art. 10 Notas da la maturitad professiunala

¹ Las notas da la maturitad professiunala vegnan dadas tenor las disposiziuns dal dretg federal.

² La direcziun da la scola relascha in reglament che cuntegna las disposiziuns per lavurs interdisciplinaras en ils roms da tut ils secturs d'instrucziun e per la lavur da project interdisciplinara. En spezial reglamentescha la direcziun da la scola la durada da preschentaziuns a bucca sco er la valitaziun da talas.

³ En englais sto vegnir absolvi in examen per in diplom da linguas estras ch'è reconuschì da l'uffizi federal competent.

⁴ Diploms da linguas estras ch'èn reconuschids da l'uffizi federal èn ina part da la nota en ils roms correspondent. La direcziun da scola relascha in reglament respectiv per quest intent.

Art. 11 Notas empiricas e certificat da notas provisoric

¹ La nota empirica per las cumpetenzas d'informatica è la media arrundada sin ina decimala da la summa da las suandantas medias da las notas e da las valitaziuns qua sutvart:

- a) la media che vegn arrundada sin in'entira u sin ina mesa nota da la summa da las notas per ils moduls dal sectur d'instrucziun «cumpetenzas d'informatica»; questa nota vegn validada cun 80 pertschient;
- b) la media che vegn arrundada sin in'entira u sin ina mesa nota da la summa da las notas per ils curs intermanaschials; questa nota vegn validada cun 20 pertschient.

² Il certificat da notas provisoric vegn emess tras la scola media d'informatica immediatamain suenter avair absolvi ils examens finals da la maturitad professiunala e cuntegna las notas da la maturitad professiunala, danor la nota definitiva per las lavurs interdisciplinaras, sco er la nota empirica per las cumpetenzas d'informatica. Ils diploms da lingua externs acquistads vegnan menziunads.

4. Furmaziun pratica professiunala

Art. 12 Praticum da manaschi lung

¹ La furmaziun pratica professiunala vegn intermediada en in praticum da manaschi lung.

² Il praticum da manaschi lung vegn per regla absolvi il quart onn da scolaziun e dura almain 220 dis da lavur, cun in pensum da lavur da 100 pertschient.

³ Las scholaras ed ils scholars tschertgan sezs lur piazza da praticum. La scola media d'informatica sustegna las scholaras ed ils scholars da tschertgar ina piazza da praticum.

Art. 13 Admissiun al praticum da manaschi lung

¹ Admess al praticum da manaschi lung vegn, tgi che cuntanscha almain la nota 4,0 en la nota empirica per las cumpetenzas d'informatica tenor las disposiziuns decisivas dal dretg federal e che ademplescha per regla las premissas per reussir l'examen da maturitad professiunala senza la lavur da project interdisciplinara. La direcziun da la scola decida davart excepziuns.

Art. 14 Accompagnament e valitaziun da la lavur da project interdisciplinara e da la lavur pratica individuala

¹ Durant il praticum da manaschi lung vegnan las scholaras ed ils scholars accompagnads d'ina persuna d'instrucziun da la scola media d'informatica, ch'è er responsabla per valitar la preschentaziun da la lavur da project interdisciplinara.

² L'accompagnament e la valitaziun da la lavur pratica individuala che vegn absolvida durant il praticum da manaschi lung, surpiglia la schefexperta u il schefexpert.

Art. 15 Directivas da l'Uffizi per la furmaziun media-superiura

¹ L'Uffizi per la furmaziun media-superiura relascha – suenter avair consultà las organisaziuns cumpetentas dal mund da lavur, l'Uffizi per la furmaziun professiunala sco er las direcziuns da scola – directivas concernent la concepziun dal praticum da manaschi lung e da la lavur pratica individuala.

5. Proceduras da qualificaziun per l'attestat federal da qualificaziun

Art. 16 Procedura da qualificaziun

¹ La procedura da qualificaziun per acquistar l'attestat federal da qualificaziun d'informatica u d'informaticher sa drizza tenor las disposiziuns decisivas dal dretg federal.

² L'Uffizi per la furmaziun professiunala sco direcziun dals examens cumpetenta decida davart la reussida da la procedura da qualificaziun.

6. Attestat federal da qualificaziun cun maturitad professiunala

Art. 17 Disposiziuns per reussir la maturitad professiunala

¹ La reussida da l'examen da maturitad professiunala sa drizza tenor las disposiziuns dal dretg federal.

Art. 18 Cumissiun d'examen

¹ Directamain suenter la realisaziun dals examens finals da la maturitad professiunala sa raduna la cumissiun scolastica d'examen tenor l'artitgel 30 alinea 1 da l'Ordinaziun davart il gimnasi¹⁾ sin invitaziun da la direcziun dals examens da la scola media d'informatica. Ella validescha las notas dals examens finals, las notas per la maturitad professiunala e la nota empirica per las cumpetenzas d'informatica.

¹⁾ DG [425.050](#)

² Cura che la nota per la lavur da project interdisciplinara è avant maun, constatescha la direziun dals examens da la scola media d'informatica, sche las premissas per reussir l'examen da maturitad professiunala èn ademplidas e communitgescha quai en scrit a las scolaras ed als scolars pertutgads.

³ Suenter la terminaziun da la procedura da qualificaziun per l'attestat federal da qualificaziun eruescha la direziun dals examens ils resultats da l'examen per las proceduras da qualificaziun e constatescha, sche la procedura da qualificaziun per l'attestat federal da qualificaziun vala sco reussida u sco betg reussida.

⁴ Las decisiuns da la direziun dals examens da la scola media d'informatica sco er da la direziun dals examens per las proceduras da qualificaziun pon vegnir contestadas entaifer 10 dis cun in recurs administrativ tar il departament.

Art. 19 Attestat federal da qualificaziun cun maturitad professiunala

¹ Tgi che terminescha cun success la procedura da qualificaziun per l'attestat federal da qualificaziun, che vegn validada tenor las disposiziuns da la Confederaziun, sco er l'examen da maturitad professiunala, survegn l'attestat federal da qualificaziun d'informatica u d'informaticher cun maturitad professiunala.

Art. 20 Repetiziun

¹ Per repeter ils examens finals da la maturitad professiunala e la procedura da qualificaziun per l'attestat federal da qualificaziun valan las disposiziuns dal dretg federal.

Art. 21 Attestat federal da qualificaziun senza maturitad professiunala

¹ Tgi che reussescha la procedura da qualificaziun per l'attestat federal da qualificaziun, ma betg l'examen da maturitad professiunala, survegn l'attestat federal da qualificaziun d'informatica u d'informaticher.

7. Disposiziuns finalas

Art. 22 Execuziun

¹ L'execuziun da questa ordinaziun è chausa da l'Uffizi per la furmaziun media-superiura.

II.

1.

Il relasch "Ordinaziun davart la procedura d'admissiun a las scolas medias (ordinaziun d'admissiun a las scolas medias)" DG [425.060](#) (versiun dals 01-08-2019) vegn midà sco suonda:

Art. 1 al. 1 (midà)

¹ Per entrar en la partiziun dal gimnasi, da la scola media commerciala, **da la scola media d'informatica** u da la scola media spezialisada d'ina scola media sto vegnir percurrìda – tant da las scholaras grischunas sco er extrachantunalas e dals scholars grischuns sco er extrachantunals – ina procedura d'admissiun tenor las disposiziuns da questa ordinaziun.

Art. 3 al. 1 (midà)

¹ Scholaras grischunas e scholars grischuns ston reussir en in examen d'admissiun chantunal per entrar en la 1. u en la 3. classa gimnasiala sco er en la 1. classa da la scola media commerciala, **da la scola media d'informatica** u da la scola media spezialisada.

Art. 4 al. 1

¹ Las scolas medias pon admetter sin il cumenzament da l'onn da scola scholaras e scholars ad ina partiziun da scola media senza ch'els fetschian in examen d'admissiun chantunal:

4. **(midà)** en cas da l'entrada en la 5. classa dal gimnasi directamain s'enter avair cuntanschì il diplom d'ina scola media commerciala **u d'ina scola media d'informatica** cun maturità professiunala, in diplom d'ina scola media spezialisada u ina maturità spezialisada, dentant sto il rom d'accent vegnir elegi tenor il diplom correspondent.

Art. 7a al. 1

¹ A l'examen d'admissiun chantunal vegnan admess scholaras grischunas e scholars grischuns ch'èn vegnids annunziads a temp e che cumprovan:

2. **(midà)** da frequentar il stgalim secundar I, per regla la 2. u la 3. classa, en cas d'in examen en la 3. classa dal gimnasi sco er en la 1. classa da la scola media commerciala, **da la scola media d'informatica** u da la scola media spezialisada;

Art. 8 al. 1 (midà)

¹ L'uffizi designescha ina grupp directiva, ina grupp d'examen per mintga rom examinà per la 1. classa gimnasiala ed in'ulteriura grupp d'examen per mintga rom examinà per la 3. classa gimnasiala sco er per la 1. classa da la scola media commerciala, **da la scola media d'informatica** e da la scola media spezialisada. El fixescha la direziun da la grupp directiva e da las gruppas d'examen.

Art. 10 al. 2 (midà)

² La grupp d'examen per la 3. classa gimnasiala sco er per la 1. classa da la scola media commerciala, **da la scola media d'informatica** e da la scola media spezialisada sa cumpona per rom examinà per regla da duas personas d'instrucziun da la scola media chantunala situada a Cuir, da duas personas d'instrucziun da las scolas medias privatas e da duas personas d'instrucziun da la scola secundara.

Art. 15 al. 1

¹ La grupp directiva calculescha la nota d'admissiun per las scolaras ed ils scolars ch'èn annunziads a l'examen d'admissiun:

2. **(midà)** en cas d'ina participaziun a l'examen d'admissiun chantunal a la 3. classa gimnasiala respectivamain a la 1. classa da la scola media commerciala, **da la scola media d'informatica** u da la scola media spezialisada directamain or da la 2. classa secundara d'ina scola che suttastat al champ d'applicaziun da la lescha davart las scolas popularas dal chantun Grischun.

Art. 17 al. 1 (midà)

¹ La nota d'admissiun a la 3. classa gimnasiala respectivamain a la 1. classa da la scola media commerciala, **da la scola media d'informatica** u da la scola media spezialisada vegn calculada a maun da l'emprim attestat da semester da la 2. classa secundara sco media arrundada sin duas cifras sunter il punct da las notas dals roms:

Enumeraziun senza midadas.

Art. 18 al. 1

¹ I dat mo in examen en scrit per l'admissiun a la:

2. **(midà)** 3. classa gimnasiala respectivamain a la 1. classa da la scola media commerciala, **da la scola media d'informatica** u da la scola media spezialisada en l'emprima lingua ch'è vegnida inditgada tar l'annunzia a l'examen, en englais, en aritmetica ed en algebra sco er en geometria.

Art. 22 al. 1

¹ L'examen d'admissiun chantunal è reussi:

3. **(midà)** a la 1. classa da la scola media commerciala, **da la scola media d'informatica** e da la scola media spezialisada, sche la media da l'examen cuntanscha la valur 4 e sche las divergenzas da las notas dals roms d'examen vers engiu cun la nota 4 n'importan betg dapli che 1,5 puncts.

2.

Il relasch "Ordinaziun davart pajaments da contribuziuns e taxas en ils fatgs da scola media dal chantun Grischun (OCTSM)" DG [425.080](#) (versiun dals 01-08-2019) vegn midà sco suonda:

Art. 9 al. 1 (midà)

¹ Scolaras e scolars cun dretg da survegnir contribuziuns, che frequentan l'emprim fin il quart onn da scolaziun dal gimnasi da 4 onns sco er l'emprim fin il terz onn da scolaziun da la scola media commerciala, **da la scola media d'informatica u da la scola media** spezialisada, ston pajar 640 francs per onn sco daners da scola.

Art. 12 al. 3 (midà)

³ ~~En il~~ **Il** quart onn da scolaziun da la scola media commerciala **e da la scola media d'informatica**, en il qual vegn fatg il praticum lung, sto vegnir pajada ina taxa da 460 francs.

Art. 13 al. 1 (midà)

¹ Ils daners da scola ston vegnir pajads fin ils 31 da schaner. Il quint vegn tramess da las scolas medias. La taxa per far la maturitad spezialisada, per far il praticum lung da la scola media commerciala **e da la scola media d'informatica** sco er per repeter in examen final betg reussi senza avair repeti anc ina giada la classa finala, sto vegnir pajada, suenter ch'ella è vegnida messa a quint da las scolas medias.

3.

Il relasch "Ordinaziun davart l'organisaziun da las scolas medias purtadas dal chantun (Ordinaziun davart l'organisaziun da las scolas medias, OOSM)" DG [425.100](#) (versiun dals 01-08-2023) vegn midà sco suonda:

Agiuntas

Agiunta 1: Disposiziuns per la Scola chantunala grischuna (SCG) sco scola media chantunala situada a Cuir (art. 4 al. 2) **(midà)**

4.

Il relasch "Ordinaziun chantunala davart la maturitad professiunala (OcMPr)" DG [430.400](#) (versiun dals 01-03-2015) vegn midà sco suonda:

Art. 4 al. 2

² Nagin examen d'admissiun na sto far tgi che:

-
- b) **(midà)** ha fatg cun success l'onn da l'entrada u l'onn chalendar precedent l'examen d'admissiun **enad** ina scola media spezialisada, **enad** ina scola media **d'informatica, ad ina scola media** commerciala ubain **enad** ina scola media d'economia ed ha absolvi la 3. classa dal stgalim ~~superiur~~ **secundar I**;

III.

Naginas aboliziuns d'auters relaschs.

IV.

Questa ordinaziun entra en vigur il 1. d'avust 2024.

Agiunta 1: Roms da promoziun (art. 4) e roms d'examen (art. 9) en il sector d'accent ed en il sector complementar

(Versiun dal 1. d'avust 2024)

I. Scola media d'informatica cun maturitad professiunala, direenziun economia e servetschs, tip economia

1. Roms dal sector d'accent

Finanzas e contabilitad sco er economia e dretg.

2. Roms dal sector complementar

Istorgia e politica sco er tecnica ed ambient.

3. Roms d'examen

Finanzas e contabilitad sco er economia e dretg.

II. Scola media d'informatica cun maturitad professiunala direenziun tecnica, architectura, life sciences (TALS)

1. Roms dal sector d'accent

Scienzas natiralas e matematica.

2. Roms dal sector complementar

Istorgia e politica sco er economia e dretg.

3. Roms d'examen

Scienzas natiralas e matematica.

Agiunta 1: Disposiziuns per la scola chantunala grischuna (SCG) sco scola media chantunala situada a Cuira (art. 4 al. 2)

(Versiun dal 1. d'avust 2024)

1. Purschida da scolaziun

- a) La SCG maina:
 - 1. in gimnasi da 6 onns ed in gimnasi da 4 onns;
 - 2. ina scola media spezialisada cun ils champs professiunals sanadad, lavur sociala sco er pedagogia ed è il lieu da scola per la maturitad spezialisada en lavur sociala;
 - 3. ina scola media commerziala cun maturitad professiunala;
 - 4. ina scola media d'informatica cun maturitad professiunala.
- b) L'instrucziun en las linguas chantunalas tudestg, rumantsch e talian vegn promovida spezialmain. Al gimnasi ston vegnir purschidas scolaziuns da maturitad bilingua en las linguas chantunalas tenor las disposiziuns da la Cumissiun svizra da maturitad (CSM).
- c) L'instrucziun d'immersiun cun englais po vegnir purschida mo en ils roms d'accent ed en ils roms complementars.

2. Commembras e commembers da la direcziun da la scola

- a) Commembras e commembers da la direcziun da la SCG èn la rectura u il rectur, la conrectura u il conrectur sco er las prorecturas ed ils prorecturs.
- b) Il grad d'occupaziun – inclusiv la part d'instrucziun – importa per:
 - 1. la rectura u il rectur 100 pertschient d'ina plazza;
 - 2. la conrectura u il conrectur 100 pertschient d'ina plazza;
 - 3. las prorecturas u ils prorecturs totalmain 300 pertschient d'ina plazza.

3. Tavla da lecziuns e plan d'instrucziun

- a) La tavla da lecziuns ed il plan d'instrucziun da la SCG a Cuira furman la referenza per las tavlas da lecziuns e per ils plans d'instrucziun correspundents da las ulteriuras scolas medias chantunalas sco er da las scolas medias privatas.

- b) Per realisar al gimnasi ils roms d'accent (senza linguas naziunalas) sco er ils roms d'elecziun / roms facultativs da tut las partiziuns èn necessarias almain 12 annunzias per rom. Per realisar ils roms d'accent en las linguas franzos, talian e rumantsch èn necessarias almain 6 annunzias.
- c) Per realisar al gimnasi ils roms complementars èn necessarias almain 14 annunzias per rom.

4. Distgargia per personas d'instrucziun cun incumbensas spezialas

- a) La rectura u il rector po conceder las suandantas distgargias:
 - 1. per la planisaziun dals uraris tut en tut maximalmain 7 lecziuns per emna ed onn;
 - 2. per la direcziun dals examens d'admissiun maximalmain 6 lecziuns per emna ed onn;
 - 3. per la direcziun dal manaschi dals stabiliments da sport maximalmain 7 lecziuns per emna ed onn.
- b) Ulteriuras distgargias sur 1 lecziun per emna ed onn ston vegnir approvadas da l'uffizi.

5. Adattaziuns dals pensums

- a) La noziun «adattaziuns dals pensums» vegn duvrada da la SCG mo per in pensum da lavur da l'onn da scola current u da l'onn da scola passà che vegn midà posteriuramain.
- b) La noziun «incumbensas spezialas» sa referescha a l'indemnisaziun da prestaziuns durant il proxim onn da scola.